

Naalakkersuisut innuttaasut nunaqarfinni isorliunerusunilu najugaqartut nammineerlutik illuliornissamut taarsigassarsisinnanissaminnut periarfissaat pitsanngorsarumallugu kiisalu nammineerlutik illuliornissamut taarsigassarsinissamut periarfissaannik ammaasseqqinniarlugit suliaqarnissaannut peqquneqarnissaannik siunnersuut. Suliaq naammassineqariissaaq UPA 2024-mut.

(Inatsisartuni ilaasortaq Jens NapätôK', Naleraq)

Akissuteqaat

(Ineqarnermut Attaveqaasersuutinullu Naalakkersuisoq)

Siullermeerneqarnera

Aallaqqaasiutigalugu Naleraq sinnerlugu Inatsisartunut ilaasortaq Jens NapätôK', aalajangiiffigisassatut siunnersuutaanut Naalakkersuisut sinnerlugit qujassuteqarfigissavarput. Naalakkersuisut ineqarnermut aningaasalersuisarnermut aaqqissuussap nalilersorneqartariaqarnera isumaqatigaat, tassani pingaartumik sanaqataasarnermik aaqqissuussaq maanna atuuttoq eqqarsaatigalugu.

2023-mut aningaasanut inatsisissatut siunnersuut naapertorlugu, inissianik aningaasalersuinermit aaqqissuussat nalilersorlugit aallartinneqarsimapput, taakku 2023-mi ukiakkut naammassineqarsimanissaat naatsorsuutigineqarpoq. Nalilersuinermit siunertarineqarpoq, aaqqissuussat pisariaqartinneqartut sorliit nalilersorneqartariaqarnerisut paasisaqarfiginissaat, tassani innuttaasut inuiaqatigiillu inuiaqatigiit aningaasaataannik pitsaanerpaamik atuinnissaat qulakkeerniarlugu. Tamatuma saniatigut nalilersuinermit siunertarineqarpoq, aaqqissugaanikkut unammillernartoqarnerisut paasisaqarfigineqarnissaa, aamma siunissami aaqqissuussanik aqutsinissaq allanngortinneqassanersut.

Tamatumunnga peqatigitillugu Naalakkersuisunut pingaaruteqarpoq, inatsimmik allannguinikkut kommuninut ataatsimoortumik tapiissutit aqutugalugit aaqqissuussamut aningaasaliissutissatut immikkoortit siunertamut atorneqarnissaasa qulakkeerneqarnissaat.

2023-mut aningaasanut inatsit pillugu isumaqatigiisummi allassimavoq, nalilersuinermit immikkut aallunneqarnissaanut pisariaqartinneqartoq, sanaqataasarnermik aaqqissuussinerup allanngortinneqarsinnaanera, taamaalilluni najugaqarfinni amerlanerusut, tassa nunaqarfinni isorliunerusunilu piginneqatigiilluni namminerisamillu inissianik realkredit atorlugu aningaasalersuiffiusinnaanngitsuni nammineq inissaqarsinnaanerat periarfissinneqarsinnaaqullugu. Tamatuma saniatigut isumaqatigiisummi aamma allassimavoq, nammineq sanaartornermit aaqqissuussinerup nalimmassakkap uterfiginissaa periarfissaasinnaasutut naleqqussorineqarpat, aaqqissuussaq taanna uterfigineqarsinnaasoq.

Naalackersuisut inissianik aningaasalersuinnermut aqqissuussat nalilersorneqarnerat tunngavigalugu sanaqataasarnermik aqqissuussamik nutaamik saqqummiussinissaq siunertaralugu inatsimmik allanguinissaq anguniagaraat. Tassannga suliaqarnermut partiit kommunillu aamma peqataatinneqassapput. Naalackersuisummi partiit siuttui allaffigeqqammerpaat. Naalackersuisummi siunnersuuteqartup saqqummiussaa timitaliiffigissallugu aallartereerpaat.

Nunatsinnimi illoqarfinni minnerusuni aammalu nunaqarfinni isorliunerusunilu inissaaleqisoqartarnera iliuuseqarfiginiarpaat iliuuseqarfiginissartillu pimoorullugu. Naalackersuisullu aningaasalersueriaaseq 95/5-imik taaneqartartoq iluatsissimasortai, ullutsinnulli naleqqussaavigineratigut atuutilersinnissaa sulissutigivaat.

Taamaattumik Naalackersuisut nunaqarfinni, isorliunerusunni kiisalu illoqarfinni minnerusuni illuliortiternermut periarfissiissutit pitsanngorsarnissaat siunertaralugu Inatsisartut inatsisissatut inatsisaata nutarternissaa siunertaralugu siunnersuummik saqqummiussissapput.

Naalackersuisut suliaq ingerlanneqalereertutut oqaatigineqarsinnaagaluartoq siunnersuutip akuersissutigineqarnissaa inassutigaat.

Taamatut oqaaseqarlunga aalajangiiffigisassatut siunnersuut Inatsisartunut suliassanngorlugu tunniuppara.